



mudiad meithrin

arbenigwyr y blynyddoedd cynnar

DATGANIAD I'R CYFRYNGAU

Mai 2020

Lawnsio Sesiynau Agored 'Clwb Cylch'

Yn ystod cyfnod pandemig y Coronafeirws, mae Mudiad Meithrin yn cyfrannu at weithgarwch Cymraeg yn y cartref trwy ddarparu sesiynau agored dan faner 'Clwb Cylch' (#ClwbCylch) i blant oedran Cylch a'u rhieni trwy lwyfannau digidol.

Bydd pwyslais penodol ar blant o deuluoedd ble na siaredir y Gymraeg yn y cartref.

Cynhelir sesiwn byw bob bore am 10.00 wedi'i seilio ar brofiad 'Amser Cylch' yn y Cylch Meithrin arferol gydag arweinydd Cylch Meithrin profiadol, gan ddefnyddio cynnwys o gynllun trochi iaith Mudiad Meithrin, Croesi'r Bont a chynllun hyfforddiant Mudiad Meithrin, Academi. Hyd y sesiynau dyddiol fydd 20 munud, a bydd thema gwahanol i bob wythnos.

Pwrpas 'Clwb Cylch' yw cefnogi teuluoedd, cynnig arlwy a diddanu plant mewn modd agored a deinamig. Rydym yn ymateb i rai pryderon na fydd plant yn clywed yr iaith arferol a glywir yn ystod sesiwn Cylch Meithrin yn ystod cyfnod y pandemig, ac yn darparu cefnogaeth ymarferol i rieni di-Gymraeg.

Meddai Dr Gwenllian Lansdown Davies, Prif Weithredwr Mudiad Meithrin:

"Nod 'Clwb Cylch' yw ceisio ail-greu peth o hwyl a chynnwrf Cylch Meithrin ar gyfer plant sydd naill ai'n colli allan ar ddarpariaeth ar y funud neu sy'n paratoi at fynd i'r Cylch maes o law. Bydd hyn hefyd yn cyfoethogi arlwy presennol 'Cymraeg i Blant' sydd wedi ei anelu at rieni a gofawyr wrth iddynt gyflwyno'r Gymraeg i'w plant".

Bwriedir cynnal sesiwn cyntaf Clwb Cylch ar dudalen Facebook Mudiad Meithrin ar Ddydd Llun 1 Mehefin am 10.00 y bore. Bydd yr holl sesiynau i'w gweld ar blatfformau digidol y Mudiad (Facebook/MudiadMeithrin, trydar@MudiadMeithrin) yn ogystal ag ar adran newydd ar wefan y Mudiad – www.meithrin.cymru/cymraegadre/

Dyma'r arweinyddion fydd yn arwain y sesiynau ar ddyddiau penodol o'r wythnos:

Dydd Llun: Wendy Phillips – Cylch Meithrin Crymoch
Dydd Mawrth: Ann Begley - Cylch Meithrin Y Llys
Dydd Mercher: Emma Healy - Cylch Meithrin Llanllyfni
Dydd Iau: Rachael Duddle - Cylch Meithrin Bae Cinmel
Dydd Gwener: Emma Monroe - Cylch Meithrin Gwdihw, Brynithel

----- Diwedd -----

NODIADAU I OLYGYDDION:

Os am ragor o wybodaeth cysyllter ag:

Iola Jones,
Pennaeth Tîm Cyfathrebu a Phartneriaethau
E-bost: lola@meithrin.cymru
Ffôn: 07841 452 607

neu Arddun Rhiannon Arwel
Swyddog Cyfathrebu
E-bost: arddun@meithrin.cymru



Gwybodaeth Gyffredinol am Mudiad Meithrin

Mae Mudiad Meithrin yn elusen gofrestrdedig (rhif elusen: 1022320). Ei nod yw rhoi cyfle i bob plentyn ifanc yng Nghymru fanteisio ar wasanaethau a phrofiadau blynyddoedd cynnar trwy gyfrwng y Gymraeg. Pan sefydlwyd y Mudiad yn 1971 roedd ffigurau'r Cyfrifiad y flwyddyn honno yn nodi mai 11.3% o blant 3-4 oed yng Nghymru oedd yn gallu siarad Cymraeg. Cafwyd cynnydd graddol ers hynny a braf nodi yng Nghyfrifiad 2011 roedd y ffigur wedi dyblu i 23.3% o blant 3-4 oed yn gallu siarad Cymraeg. Heb os, mae'r gwaith caled a wnaed yn y Cylchoedd Meithrin a'r cylchoedd Ti a Fi dros y blynyddoedd wedi cyfrannu'n helaeth at sicrhau'r cynnydd yma.

Mae dros 1,000 o ddarpariaethau blynyddoedd cynnar y Mudiad ledled Cymru yn cynnwys:

Cymraeg i Blant - cynllun yn canolbwyntio ar gynyddu niferoedd siaradwyr Cymraeg ymhlith plant oedran meithrin trwy gynnal sesiynau Cymraeg i Blant i deuluoedd gyda phlant ifanc a babanod ar draws Cymru.

Cylchoedd Ti a Fi – dyma gyfle gwych i blant o enedigaeth hyd at oed ysgol a'u rhieni gwrdd unwaith yr wythnos i gymdeithasu a rhannu profiadau ac i chwarae gyda'i gilydd mewn awyrgylch anffurfiol Gymreig.

Cylchoedd Meithrin – mae Cylchoedd Meithrin yn cynnig sesiynau gofal ac addysg ddyddiol ar gyfer plant 2 - 5 mlwydd oed. Mae dros 12,000 o blant yn cael cyfle i ddysgu trwy chwarae yn y Gymraeg yn y cylchoedd meithrin.

Canolfannau Integredig - mae ein Canolfannau Integredig yn cynnig amrywiaeth eang o wasanaethau cefnogol cyfrwng Cymraeg ar gyfer plant a'u teuluoedd sy'n cynnwys gofal dydd llawn a sesiynol, darpariaeth cyn ac ar ôl ysgol, hyfforddiant a chyngor i rieni.

Meithrinfeydd – mae ein meithrinfeydd dydd yn cynnig gofal ac addysg o ansawdd i blant dros chwe wythnos oed hyd oed ysgol mewn awyrgylch deniadol, diogel, cyfeillgar a Chymreig.

Cynlluniau Cyfeirio - mae Cynlluniau Cyfeirio'r Mudiad yn cynnig cefnogaeth arbennig i blant gydag anghenion ychwanegol.

Cynllun Hyfforddi Cenedlaethol, Cynllun Ysgolion Cam wrth Gam ac Academi – adrannau o'r Mudiad sy'n gyfrifol am ddatblygu a chynnal hyfforddiant ym maes gofal ac addysg blynyddoedd cynnar cyfrwng Cymraeg i ddisgyblion mewn ysgolion uwchradd ynghyd ag uwchsgilio staff a gwirfoddolwyr yn y Cylchoedd Meithrin.

Dewin a Doti – cymeriadau unigryw'r Mudiad sy'n ffrind i holl blant y cylchoedd meithrin ac sy'n eu helpu a'u hybu i siarad Cymraeg. Mae modd prynu nwyddau Dewin a Doti sy'n unigryw i'r Mudiad trwy'r siop ar-lein – www.meithrin.cymru/siop

Codi arian – gan fod y Mudiad yn elusen gofrestrdedig rhoddir pwyslais ar weithgareddau codi arian trwy'r Clwb 100, pecynnau nawdd, a nifer o ddigwyddiadau codi arian yn lleol ac yn genedlaethol.

Mae dros 220 o staff cyflogedig gan Mudiad Meithrin yn genedlaethol a thros 1,500 o staff yn gweithio yn y cylchoedd meithrin. Mae Swyddogion Datblygu'r Mudiad yn gweithio'n lleol yn eu siroedd er mwyn cynnig arweiniad a chyngor ymarferol i staff y cylchoedd, gwirfoddolwyr a rhieni.

Mudiad Meithrin - arbenigwyr y blynyddoedd cynnar

www.meithrin.cymru